

欽定續文獻通考



欽定續文獻通考卷三十四

選舉考

臣等謹案馬端臨作選舉考自舉士以至資選方伎辟舉考課等門條分類聚固足見前代之章程矣宋之選舉首重進士制科其次則三學選補至於教官武舉童子等試以及遺逸奏薦貴戚公卿任子親屬與遠州流外諸選雖委曲瑣細咸有品式故得人稱盛焉遼金元以武開國崇尚弓馬遼景宗道宗亦行貢試金太宗世宗屢闢科場元初以科舉選士至仁宗延祐間始斟酌舊制而行之當時褒然舉首應上所求者皆彬彬輩出矣明制科目爲上卿相皆由此出學校則儲才以應科目者也其徑由學校通籍者亦科目之亞也外此則雜流矣然進士舉貢雜流三途並用雖有畸重無偏廢也茲纂續考於宋斷自宣宗迄於明代其見於史志紀傳各書者仍仿馬氏之例依次編輯庶幾存各朝之制而其間得失之故亦可徵其梗概云

舉士

宋理宗寶慶二年以士子弊竇日滋左諫議大夫朱端常陳防戢之策從之時舉人之弊凡五曰僞義曰換卷

曰易號曰卷子出外曰謄錄滅裂於是用端常言命試院申嚴門禁入試日一切不許傳遞士人暮夜投卷令封彌官躬親封緘卷匱士人親書簿歷投匱中俟舉人盡出院然後啟封分類抄上卽付謄錄所明旦申逐場名數於御史臺檢核其撰號法上一字許同下一字各異以杜訛易謄錄人選擇書手充不許代名其考官容情任意者許臺諫風聞彈奏至嘉熙二年又以類試卷封彌作弊不一命前期於兩浙轉運司臨安府選見投吏胥共三十人差近上一名部轄入院十名專管詩賦餘分管諸經各隨所管號於引試之夕分尋試卷各置簿封彌不許

混亂別差一吏將號置歷發過謄錄所書寫其簿歷封彌官收掌不經吏手不許謄錄人干預以革其弊

紹定元年復知舉參詳差臺諫御史舊制初省試奉勅差知貢舉一員同知三員內差臺諫官一員參詳官若干員內差監察御史一員俾會聚考校微寓彈壓糾察之意蓋宗初韓侂胄用事將鈐制士人遂於三知舉外別差同知一員以諫官爲之專董試事不復干預考校參詳官亦不差察官於是約束峻切氣燄薰灼嘉泰間更名監試製造簿歷嚴立程限其失愈甚至是復舊制三知舉內差一臺諫十參詳內差一御史至端平初侍御史李鳴復等又言臺諫充知舉參詳既留心考校不能檢梃姦弊乞仍舊差臺諫爲監試從之

二年飭考官明示詞賦題意各房分經考校臣僚言詞賦命題不明致士子上請煩亂經義不分房別考致士子多悖經旨因有是命至三年臣僚又請學校場屋並禁斷章截句破壞義理及春秋經越年牽合其程文本古注用先儒說者取之穿鑿撰說者黜落

定四月上旬廷試至期更不移展向廷試惟蜀士到杭最遲每展日以待會有言蜀士嗜利多引商貨押船致留滯關津者故爲定期至淳祐九年省試用三月廷試用八月遠方之士往往滯留逆旅十二年乃詔來年省試仍用二月一日廷試用四月十五日以前度宗咸淳十年成都已失廷試擬五月五日蜀士至者絕少展至末旬又因覆試特奏名至部猶少展作六月七日復以隆暑命立秋後擇日

四年勅漕臣嚴選考官仍令有司量展揭封之期嚴治士子虛僞之罪時場屋士子日盛卷軸如山有司不能徧觀迫於日限去取不能皆當蓋士人旣以本名納卷或別爲名或易以字一人納二三卷不禁挾書又許見燭浙閩諸郡又間日引試中有一日之暇甚至次日午方出於是經義可作二三道詩賦可成五六篇幸皆中選往

往以兄弟承之或轉售同族姦詐百端乃命諸郡關防於投卷之初責鄉鄰覈實嚴治虛僞之罪縱容之罰其弊稍息

復四川類試遣官之制 四川類試其事雖隸制司而監試考官共十員惟大院別院監司主文各一員從朝命餘聽制司選差自安丙爲四川制置大使差四員之外權委成都帥守臨期從近取具是歲始仍舊朝命四員餘從制司分選

詔避親人與漕舉及待補國子生到省者同試於別院 舊制避親舉人與命官鎖廳同試自紹熙三年分場各試其額太窄寒士憚之朝士之被差爲大院考官者恐多妨其親亦不願差寒士於鄉舉千百取一之中得預秋薦以數千里之遠辛勤赴省而省闈差官乃當相避遂有隱身匿名不認親戚以求免者有憤懣憂沮狼狽旅邸者至是言者謂除大院收試外以漕舉及待補國子生到省者與避親人同試於別院亦將不下數百人數既多其額自寬寒士可不怨其親戚朝士可不憚於被差從之既而以諸路轉運司牒試多營求僞冒之弊罷之其實有妨嫌者收試每百人終場取一人各路州軍解額窄者量與均添於是臨安紹興溫台福婺慶元處池袁潮興化及四川諸州府共增解額一百七十名未幾又命止許牒滿里親子孫及門客召見任官二員委保與有官礙格人各處收試五十人取放一人合牒親子孫別項隔截收試不及五十人亦取一人凡涉詐冒並坐牒官保官至端平初有言門客及隨侍親子孫五十人取一臨安府學三年類申人漕試七十取一別院分項收試已爲煩碎兼之兩項士人習賦習書之外習他經者差少難於取放遂命將兩項混同收試考校均作六十取一京學行食職事生員二百二十四名別項發號考校不限經賦取放一名至嘉熙元年罷諸牒試凡鄣官以上監司守倅

之門客及姑姨同宗之子弟與游士之不便於歸鄉者並混同試於轉運司各從所寓縣給據赴司納卷一如鄉舉之法家狀各書本貫不問其所從來而定其名曰寓試以四十名爲額滿五千人則臨時取旨增放二年言者又以類申門客滿里子孫仍前漕試六十人取一較之他處雖甚優而取無定額士有疑心就試者少宜令額寬而試者衆塗一而取之精遂依前例放行寓試亦以四十名爲定額仍前待補其類申門客滿里子孫及附試並罷四年以兩浙轉運司寓試終場滿五千人特命增放二名後雖多不增如不及五千人止依原額

詔唐鄧二州類試襄陽如舊制復光州解額 唐鄧二州嘗陷於金金滅復得其地因命仍舊於襄陽類試但別號考校以優新附之士光州解額舊制七名渡江後爲極邊士子稀少權赴試鄰州孝宗淳熙間本州自置科場權放三名至是已五六十年舉人十倍於前遂命復舊額

端平元年詔士子發解二十年凡五到省許就特科以四分取一置前四等

甲定宗子鎖廳應舉解試之制 宗子試法始於神宗熙寧十年高宗紹興初行在宗室試國子監者有官鎖廳七取其三無官應舉七取其四無官袒免親取應文理通爲合格不限數而外任主宮觀獄廟試於轉運司者取放之額同進士十五年命諸路宗室願赴行在試者依熙寧舊制並國子監請解不願者依崇寧通用貢舉法孝宗登極凡宗子不以服屬遠近人數多寡其曾獲文解兩次者並直赴廷試略通文墨者量試推恩習經人本經義二道習賦人詩賦各一道試論人論一首仍限二十五歲以上合格第一名承節郎餘並承信郎曾經下省入免量試推恩四川則附試於安撫制置司於是入仕者驟踰千人隆興元年詔量試不中年四十以上補承信郎展三年出官餘並於後舉再試四月御射殿引見取應省試第一人賜同進士出身第二第二人補保義郎餘四

十人承節郎七人承信郎凡宗室鎖廳得出身者京官進一秩選人比類從資無官應舉得出身者補修職郎濮秀二王下子孫中進士舉者更特轉一秩乾道六年臣僚言比年宗子雋異者多或冠多士或登詞科幾取寒士齊驅而入仕寔繁未知裁抑非所以示至公也於是禮部請鎖廳登第者舊於原官上轉行兩官自今依原資改授餘准舊制十二年右正言胡衛請自今宗室監試無官應舉照鎖廳例七取其二省試則三舉所放人數如取應例立爲定額從之寧宗嘉定四年詔鎖廳應舉省試第一名殿試唱名授官日應得恩例外更遷一秩至是命宗子鎖廳應舉解試凡在外州軍或寄居或見在隨侍及見寓行在就試者各召知識官委保正身國子監取其出身訓名生長左驗以憑保收試仍於試卷家狀具保官職位姓名以防欺詐至度宗咸淳元年以鎖廳應舉宗子兩請舉人遇卽位赦恩並赴類試其曾經覆試文理通者照例升等文理不通及未經覆試者則否第五等人特與免銓出官九年凡無官宗子應舉初生則用乳名給據既長則用訓名其赴諸路漕司之試因有一人前後用兩據印二卷者乃命漕司並索乳名訓名各項公據方許收試以杜姦弊

嘉熙元年罷牒試仍申嚴冒牒國子之禁

時牒試既罷士人又復冒求國子而士大夫爲子弟計者輒縱然有

他族利爲場屋相資或公然受價以鬻乃命徧諭百官司知雜司等如已準朝廷辦驗批書印紙批下國子監收

試卽報赴試人躬赴監一姓結爲一保每保不過十人責立罪罰當官書押遞相委保各給告示方許投納試卷

冒牒官降官罷任或一時失於參照誤牒他族許自陳悔牒一次冒牒中選之人限主保官舉人一月自首舉人

駁放主保官免罪出限不首者仍照前條罪之二年臣僚言國子牒試之弊冒濫滋甚今後令牒官各從本職長

官具朝典狀保明先期取本官知委狀仍立賞格許人指實陳首冒牒之官按劾鐫秩受牒之人駁放殿舉保官

亦與連坐專令御史臺覺察都省勘會淳祐九年臣僚又言士子又有免解僞冒入試者或父兄沒而竊代其名或同族物故而填其籍於是令自本貫保明給據類其姓名先申禮部各州揭以示衆犯者許告捉依鬻舉法治罪 寶慶間禮部侍郎曹彥約奏曰科舉之弊莫甚於牒試而牒試之弊莫甚於作僞蓋解額之有廣狹士子之有衆寡廣而寡者固已安其分則狹而衆者必思所以爲之計朝廷以承平日久士子日盛設爲牒試之法寬其進取之門末節細故未暇深察於是改鄉里以就他人之貫改三族以認他人之親甚者改其父祖改其姓氏若得若失尙未可知而欺君之跡已昭昭不可掩矣今國子監牒試其弊尙少臣不知其本末未敢據議惟是漕試之弊積習既久士大夫互相欺詐恬不爲怪壞士子心術莫甚於此時舉摘一二尤者而懲戒之於事無補律以科舉之法無一可者則改而更張之不可緩也好事者深知其不便求其說而不得欲增解額則難立限制欲均解額則侵及他郡欲廢漕額以益諸郡不特舊額不等極費區處而所部之親戚故舊有決不可不避者變舊法以起爭端終不可久無已則有一焉在內有職事官朝廷之所選用也在外有監司帥守朝廷之所責任也大郡之有通判小郡之有簽判轉運司之有主管文字諸路之有川廣福建又遠地之多士子處也與其詐僞避親而使之冒試孰若嚴其保任而使之牒試隨其官品分其差等若監司帥守可舉十五人則大郡可舉十人中下郡可舉七八人通判可舉五人主管文字與簽判可舉三人川廣福建不在此位者不過一二人職事官之牒門客者當如其舊其以川廣福建牒者郎官以上不得過下郡之數寺監丞以下不得過通判之數明載公牘參以法令如是行之不增發解不拂人情而解額之狹處與士子之衆處受其利如前日也但前之爲法不許其保任而容其詐僞後之爲法不容其詐僞而許其保任其利害相去何如哉然州縣官之牒本路可以稽考而監司帥守

之牒鄰路容有泛濫且如兩浙路與江東福建爲鄰而又與淮東爲鄰湖北一路與湖南江西爲鄰而又與淮西京西夔路爲鄰若止許一處則地里有不便或分之數路則渙散而無統須合與之關防立爲限制應監司帥守牒過員數並限九月三十日以前具申禮部禮部總其名數並限九月三十日具申部省備牒御史臺諫院則其弊可革矣

初置紹興安吉試院 時以士子數多於禮部及臨安轉運司兩試院外紹興安吉各置一院從朝廷差官前詣同日引試分各路士人就試同在京不許見燭 是年已失京西諸州軍士多徙寓江陵鄂州命京湖制置司於江陵別立貢院取德安府荊門軍歸峽復三州及隨郢均房等京七郡士人別差官混試用十二郡原額混取以優之

二年命省試下第及游學人並就臨安府給據赴兩浙轉運司混試待補國子生 元年罷諸路轉運司及諸州軍府所取待補國子生命自明年並赴國子監混試至是遂有是命

四年詔兩淮經寇州郡已舉未改免人與比荆襄例令赴來年省試一次

淳祐元年復別院引試之制 臣僚言既復諸路漕試合國子試兩項科舉及免舉人不下千數宜復撥漕舉貢舉同避親人並就別院引試使大院無卷冗之患小院無額容之弊從之三年仍令試別院者復歸大院

二年詔軍功補授人願就鄉舉者聽

三年申定試法科之制 先是寧宗嘉定十一年五月申嚴試法官七等之制至是以試法科者皆取撰成見義挾入試場令刑部措置關防其考試則選差大理丞正應任中外有聲望者不許止用新科評事未經作縣之人

逮其試中仍倣省試中書覆試之法質以疑獄觀其識筆明允始與差除所立等第文法俱通者爲上徑除評事
文法粗通者爲次其檢法不通者駁放至度宗咸淳元年復申嚴選試之法凡引試刑法官命題一如紹興式八
年以試法科者少特命考試命題務在簡嚴毋用長語有過而願就試者照現行條法除私罪應徒或入己贓失
入死罪并停替外餘犯輕罪者與放行收試或已經三試終場之人已歷三考赴部參注命本部考覈原試果有
所批分數不須舉狀與注外郡刑法獄官差使一次舊制試法科者批及八分方在取放之數咸淳末有僅及二
分以上者亦特取一名授提刑司檢法官

命淮東西諸州郡附近秋試 時淮南諸州郡歲有兵禍士子不得以時赴鄉舉且漕司分差試官路梗不可徑
達乃命淮東州郡附鎮江府秋試淮西州郡附建康試蘄黃光三州安慶府附江州試三處各增差試官二員別
項考校照各州原額取放

四年增點檢雷同官 紹定元年有言舉人程文雷同或一字不差者其弊有二一則考官受賂或受暗記或與
全篇各家分傳謄寫一則老儒賣文場屋一人傳十十人傳百考官不暇參稽於是命禮部戒飭前申號三日監
試會聚考官將合取卷參驗互考稍涉雷同卽與黜落或仍前弊以致覺察則考官監試一例黜退至是復添差
點檢雷同官一員仍命監察御史一人鈐試度宗初以雷同假手之弊多由於州郡試院間日引試以致繼燭達
旦或至次日辰已猶未出院遂一遵舊制連試三日咸淳九年又以臣僚條上科場之弊令大院別院參詳官點
檢試卷官兼考雷同又監試兼專一詳定雷同試卷不預考校遂罷簾外點檢雷同官其國子監解試雷同官亦

臣等謹按宋時省闈體例士人卷子先經點檢官批定分數然後參詳官審定其當否上之知舉而決其去取高下則一卷凡經數人之手而雷同之辨其疎玩亦太甚矣

六年命三學在籍諸生並起來年省試一次詔曰昨令三學各舉經明行修氣節之士而諸生合辭控免秉義甚高其令在籍諸生並起來年省試一次臨安府學長諭亦如之以稱搜羅之意

十年詔每舉待補人先就郡庠試詔曰國家以儒立國士習美惡治道所關端平初增諸郡解額濶濶牒試正欲四方之士安鄉井修孝悌以厚風俗比歲殊失初意可令逐州於每舉待補人數內分額之半先就郡庠校以課試取分數及格者同待補生給據赴上庠補試其大府一體施行次年又謂輔臣曰去歲罷京學類申欲令四方之士各歸鄉校以課試校定稍復鄉舉里選之意近覽士著士人投匭之書謂猶有未還鄉井者科舉在近可令臨安守臣曉諭士子早還本鄉所有土著人自依此制行歲校之法其游士出學年久不能赴鄉舉者與赴浙漕試另行考校仍取待補以示優卹

十二年詔廣南分東西兩路考試廣南西路言所部二十五郡科選於春官者僅一二蓋山林質樸不能與中士士子同工請援兩淮荆襄例別考從之

寶祐二年定發解給歷之法監察御史陳大方言士風日薄文場多弊乞將發解士人初請舉者從所司給帖赴省別給一歷如命官印紙之法批書發解之年及本名年貫保官姓名執赴禮部又批赴省之年長貳印署赴監試者同如將來免解免省到殿批書亦如之如無歷則不收試候出官日赴吏部繳納換給印紙應合免解免省人亦從先發解處照此給歷如省殿中選將元歷發下御史臺考察以憑注闕給告士子得歷可爲據證有司

因歷可加稽驗目前僞冒之人可不卻而自遁遂自明年始行之四年又命在朝之臣除宰執侍從臺諫外自卿監郎官以下至釐務官各具三代宗支圖三本結立罪狀申尚書省御史臺及禮部所屬各置簿籍存留照應遇屬子孫登科發解入學奏補事故並具申入鑒後由外任登朝亦於供職日後具圖籍記如上法遇胄試之年照朝廷限員於內牒能應舉人就試以革胄牒冒濫之弊

景定二年增胄子牒試員 初寶慶元年詔胄試職事官牒同居五服內親釐務官牒同居小功親銓次三人取一至是復命宰執牒總麻以上親增作四十人侍從臺諫給事中舍人小功以上親增作二十七人卿監郎官祕書省官四總領小功以上親增作二十人寺監丞簿學官二令大功以上親增作十五人六院四轄省部門史館校勘檢閱大功以上親增作十人臨安府通判大功以上親增作八人餘應牒親子孫者一仍舊制

三年以建儲恩詔三學免解外行食生員兩赤縣解試終場人及臨安府學職事生員特令赴省一次

二月詔省試中選士人覆試於御史臺爲定制 舊制鄉貢監補省試皆有覆試其法令宰執出題不許都司干預仍日輪臺諫一員簾外監試至是并士人中選者亦覆之度宗初又以州郡鄉貢未有覆試易滋冒濫之弊命漕臣及帥守於解試揭曉之前點差有出身倖貳或幕官專充覆試盡一日命題考校解名多者斟酌分日但能行文不謬說理優通覺非假手卽取非才不通就與駁放如將來省覆不通罪及原覆試漕守之臣及考校官又嚴省覆試法比校中省原卷字跡稍異者黜之

五年正月詔三省詳議取士之法 詔略曰我國家因唐之舊進士一科得人爲盛三百年間所以保乂王家垂休億載厥功懋哉弊久蠹滋近年尤甚非無佳士穎出由此其選然窮經學古者或病於詞華植德礪行者難究

其蘊奧高才大器者往往局於纖悉繩墨之末是以官甚冗而才愈乏家殊俗而風益漓至於冒國法以苟營假儒冠而挾策俚言亂雅勦說趨時使習之者反賊其良而取之者莫任其咎人情至此咸欲變通嘗閱先朝名臣奏議其論取士之法非一惟程顥程頤深知治道酌古通今綱目詳明用意純切令三省詳議參酌其可行者條具以聞務於科舉無大更張以安士心而於進士舉之外所以崇尚經術考察德行選用材能之道立爲一代之典陶成四方之風庶幾豐芑之仁垂之萬世顧不美哉

度宗咸淳七年十二月初置士籍 丞相賈似道欲制東南士心令御史陳伯大請置士籍開具姓名年甲三代妻室令鄉鄰結勘於科舉條例無礙方許納卷 周密癸辛雜識曰咸淳辛未正言陳伯大建議以爲科場之弊極矣欲自後舉始行下諸路運司滕州縣先置士籍編排保伍取各家戶貫三代年甲娶誰氏兄弟男孫若干之數其有習舉業者則各書姓名所習賦經子孫憑所書年甲如十五以上實能舉業者自五家至二十五家而百家百家而里正許自召其鄉之貢士結罪保明批書舉歷然後登士籍一樣四本州縣漕部各解其一仍從縣給印歷俾各人親書家狀於歷首以爲字跡之驗不許臨期陳狀改易或有隨侍子弟合赴漕牒諸色漕試者各令齋歷先赴縣批鑒前去各處狀試每遇唱名後重行編排保伍取會如有新進可應舉者續照前式保明付籍或有事故服制者並畫時申聞批鑒或毀抹如虛增人名妄稱舉子其犯人與里正保伍並照貢舉條例施行自是嚴行天下或稍有瑕疵皆不敢有功名之望士論紛紛至賈似道潰師之後臺中始首効伯大焉

九年以諸州郡鄉貢終場人衆而原額少命自今年爲始視終場人數多寡每二百名取放一名 是年省試亦以士子數多增參詳官三員點檢試卷官六員

遼景宗保寧八年十二月詔復南京禮部貢院

聖宗統和六年詔開貢舉 葉隆禮契丹國志曰太祖起朔漠之區倥偬干戈武事未戢何有科目延及數世承平日久始有開闢制限以三歲有鄉府省三試之設鄉中曰鄉薦府中曰府解省中曰及第時有秀才未願赴者州縣必根刷遣之程文分兩科一曰詩賦一曰經義魁各分爲每三歲輒一試進士貢院以二寸紙書及第者姓名於上給之號爲喜帖明日舉案而出樂作及門擊鼓十二面以法雷震殿試臨期取旨又將第一人特增一官授奉直大夫翰林應奉文字第二第三人授徵事郎餘並授從事郎聖宗時止以詞賦法律取士詞賦爲正科法律爲雜科

七年三月宋進士挈家來歸者十七人命有司考其中第者補國子官餘授縣主簿尉

興宗重熙十九年六月詔醫卜屠販奴隸及悖父母或犯事逃亡者不得舉進士

道宗大安五年三月詔析津大定二府精選舉人以聞仍詔論學者當窮經明道

天祚帝乾統五年十一月禁商賈之家不得應進士舉

遼登科總目

聖宗統和六年賜及第一人

臣等謹按遼科目始見於統和而室昉傳稱會同初登進士第則進士之來遼矣

七年八月放進士高正等二人及第

八年放鄭雲從等二人及第

九年放進士石用中一人及第

十一年十一月放進士王熙載等二人及第

十二年放進士呂德懋等二人及第

十三年放進士王用極等二人

十四年放進士張儉等三人

十五年放進士陳鼎等二人

十六年放進士楊文立等二人

十七年放進士初錫等三人及第

十八年放進士南承保等三人及第

二十年放進士邢祥等六人及第

二十二年放進士李可封等三人

二十四年放進士楊信等二十三人及第

二十六年放進士史克忠等一十三人

二十七年御前引試劉二宜等三人

二十九年御試放高承顏等二人及第

開泰元年五月放進士史簡等十九人及第
是年詔裴元感邢祥知禮部貢舉七月進士康文昭張素臣鄭元

達等坐論知貢舉私曲皆杖而徒之

二年放進士鮮于茂昭等六人及第

三年放進士張用行等三十一人及第出身

五年放進士孫傑等四十八人及第

七年十二月放進士張克恭等三十七人及第

九年十二月放進士張仲舉等四十五人

太平二年放進士張漸等四十七人

四年放進士李炯等四十七人

五年十二月試進士張昱等七十二人各授官有差 時帝幸內果園宴京民聚觀求進士得七十二人命賦詩

第其工拙以張昱等一十四人爲太子校書郎韓樂等五十八人爲崇文館校書郎

八年放進士張宥等五十七人

臣等謹按七年十一月紀云以楊又元邢祥知貢舉而不言放進士

九年十一月皇城進士張人紀趙睦等二十七人入朝試以詩賦皆賜第

興宗景福元年御宣政殿放進士劉眞等五十七人 先是聖宗太平十年七月詔來歲開貢舉至是興宗卽位

遂遵行之

重熙元年放進士劉師眞等五十七人

五年十月御元和殿放進士馮立等四十九人時以日射三十六熊賦幸燕詩試進士於廷賜馮立趙徽四十九人進士第以立爲右補闕徽以下皆爲太子中舍賜緋衣銀魚遂大宴宰臣張儉請幸禮部貢院歡飲至暮而罷賜物有差

七年六月御清涼殿試進士賜邢彭年以下五十五人第

臣等謹接傳言趙徽中重熙五年甲科王觀中重熙七年乙科則遼時科第亦有甲乙之分也

十一年六月御清涼殿放進士王實等六十四人

十五年六月御清涼殿放進士王棠等六十八人

十九年六月御金鑾殿試進士

道宗清寧元年御清涼殿放進士張孝傑等四十四人

五年御百福殿放進士梁援等百一十五人

八年六月御清涼殿放進士王鼎等九十三人

臣等謹按王鼎傳稱清寧五年進士

咸雍二年御永安殿放進士張臻等百一人

六年六月御永安殿放進士趙廷睦等百三十八人九月以馬希白詩才敏妙十吏書不能給召試之

十年六月親出題試進士

太康五年六月放進士劉瓘等百一十三人

欽定續文獻通考 卷三十四
九年御前放進士李君裕等五十一人

大安二年五月放進士張穀等二十六人

六年放進士文充等七十二人

八年放進士寇尊文等五十三人

壽隆元年放進士陳衡甫等百三十人

六年放進士康秉儉等八十七人

天祚帝乾統三年放進士馬恭回等百三人

七年放進士李石等百人

九年放進士劉禎等九十人

天慶二年放進士韓昉等七十七人

臣等謹按遼之進士皆漢人契丹人無舉進士之條傳載重熙中耶律富魯舉進士第帝怒其父庶箴擅令子就科目有違國制鞭之二百然天祚紀載耶律達實舉天慶五年進士而紀於五年又不云放進士蓋史之缺漏多矣

八年放進士王翬等百三人 後耶律淳於保大二年自立改爲建福元年放進士李寶信等一十九人以醫官李爽陳泌十餘人曾與大計並賜進士及第授官有差淳卒妻德妃稱制改元德興放進士李球等百八人

金取士之制有詞賦經義策論律科經童其試詞賦經義策論中選者謂之進士律科經童中選者曰舉人凡諸